

Հ Ա Ն Գ Ի Ս Տ
ԱՐԺԱՆԱՊԱՏԻՎ Տ. ՀԱՄԱԶԱՍՊ ՔԱՀԱՆԱ ԱԲՐԱՀԱՄՅԱՆԻ
(1864—1959)

Նոյեմբերի 24-ին, երեքշաբթի օրը, 95 տարեկան հասակում, Կիրովաբադում վախճանվեց արժանապատիվ Տ. Համազասպ քահանա Աբրահամյանը:

Հանգուցյալը ծնվել է 1864 թվականին այժմյան Մարտունու շրջանի (նախկինում Վերինդե) Ղըզ-ղալա գյուղում, քահանայի ընտանիքում: Նրա հայրը՝ Տ. Գաբրիել ավագ քահանա Աբրահամյանը նույնպես եղել է հայտնի եկեղեցական:

Տ. Համազասպը իր նախնական կրթությունն ստացել է իր ծննդավայրի թեմական դպրոցում, Ղազարոս Աղայանի տեսչության օրոք: 1918 թվականին Ամարասի պատմական վանքում քահանա է ձեռնադրվում Անանիա արքեպիսկոպոսի ձեռամբ և պաշտոնավարում է իր հայրենի գյուղի Ս. Աստվածածին եկեղեցում մինչև 1934 թվականը: Այնուհետև քահանայագործում է Կիրովաբադ քաղաքի Ս. Գրիգոր Լուսավորիչ եկեղեցում մինչև իր մահը:

Հանգուցյալը եղել է պարտաճանաչ, նվիրված, իր ժողովրդից սիրված քահանա: 1956 թվականին, Ադրբեջանի թեմի հայոց առաջնորդ հոգեշնորհ Տ. Տիրայր վարդապետ Մարտիկյանի միջնորդությամբ, Վեհափառ Հայրապետից պարգևատրվել է քահանայական լանջախաչով, իր բարվոք և նվիրված ծառայության համար:



Հանգուցյալի հուղարկավորությունը և թաղումը տեղի է ունեցել Կիրովաբադում, նախագահությամբ Բաքվի եկեղեցու ավագներից արժանապատիվ Տ. Վահան Գրիգորյանի, որն իր դամբանակում անդրադարձել է հանգուցյալի մատուցած հոգևոր ծառայության վրա:

Հանգիստ հանգուցյալի ոսկորներին և խաղաղություն նրա հոգուն:

